


E LUS DI MUNDU

Bos di Profesia Lès 19

E FIN DI MUNDU



Versikulo di Memoria: *"Anto e Rei lo bisa esnan na Su man drechi: boso ku ta bendishoná di Mi Tata, eredá e reino ku ta prepará pa boso desde e fundashon di mundu" (Mateo 25:34).*

Den e lèsnan anterior nos a studia hopi kos di e regreso di Hesus na tera, di resurekshon di e mortonan, i e destrukshon di esnan malbado. Den e lès aki, nos lo trese tur e gran eventonan aki den un estudio, pa nos por tin un portret korekto den nos mente di loke ta bini i ki dia.

E ABISMO

1. Ki kastigu straño lo bini pa Satanas na fin di mundu?

"I mi a mira un angel ta baha for di shelu ku e yabi di e abismo i un kadena grandi den su man. I el a gara e dragon, e kolebra di antiguedat, kende ta diabel i Satanas, i a mirá pa mil aña, i a tiré den e abismo, i a sera i seya esaki, pa e no gaña e nashonnan mas, te ora ku e mil añanan a keda kumpli; despues di e kosnan aki e mester lag'é lès pa un tempu kòrtiku" (Revelashon 20:1-3).

Satanas lo ta mará den e abismo pa mil añanan (1.000), a ún milenio. Algun hende ta papia di e milenio komo si fuera e ta un tempu di pas maravioso riba e mundu aki. Segun ku nos ta sigui ku nos estudio, lo bo mira kiko e milenio ta enberdat. Pero, prome, laga nos splika e palabra straño "abismo", kaminda Satanas lo ta mará.. Ki klase di lugá e ta? ABISMO ta referí na un luga desola, seku, sin uso; generalmente, un luga inhabitabel. Esei ta net manera mundu tabata den prinsipio, bashi i sin forma. "I tera tabata sin forma i bashi; i tabatin skuridat riba superfisio di e abismo" (Genesis 1:2).

E palabra ei "profundidat" (*Abyss, for di e palabra Griego abyssos*) den Genesis 1:2, ta mesun abismo di Revelashon 20:3. E mundu tabata sin forma i bashi, desold.

2. Kon e profetanan ta mostra ku e tera aki lo bolbe bini na mesun kondishon di desolashon?

"Mi a wak riba tera, i ata, e tabata sin forma i bashi, i na e shelunan, i no tabatin lus... Mi a wak, i ata,

no tabatin ningun hende, i tur e paranan di shelu a hui bai. Mi a wak, i ata, e tera fruktifero a bira un desierto, tur su statnan a wòrdu basha abou dilanti di Señor, dilanti di Su rabia ardiente" (Jeremias 4:23, 25, 26).

Jeremias a bisa ku e tempu lo yega ora ku e mundu lo ta atrobe sin forma i bashi; lo e ta den tal kondishon di ruina i desolashon, ku ta referí na dje komo un abismo. Isaías a deskribi e mesun kondishon teribel den e palabranan aki: *"E ora ei mi a bisa: 'Pa kuantu tempu mas, Señor?' i El a kontesta: 'Te ora statnan keda ruina i sin habitante, kasnan keda sin hende, i e tera keda kompletamente desolá'" (Isaias 6:11).*

NOTA ku tur dos e profetanan ta bisa ku e tempu ta bini, ora ku lo tin ningun hende ariba tera-- e tera lo ta dañá i sin habitante. Tur e statnan lo wòrdu basha abou, i asta e lugarnan di fruta lo bira un desierto grandi i tristu. Ki lugar _di horror skur i espantoso e lo ta! *Tur e destrukshon aki ta turna, lagá na e binida di Hesus.*

E TERA DESOLA

3. Kiko lo tapa tera?

"I esnan ku Señor mata riba e dia ei lo keda bentá tur kaminda, for di esun ekstremo di mundu te na e otro. Hende lo no lamentá pa nan ni rekohe nan, ni dera nan; nan lo ta manera mèst riba superfisio di tera" (Jeremias 25:33).

E superfisio di tera lo ta tapá ku kurpanan morto, ku no a wòrdu dera ni lamentá.

4. Kon e mundu a wòrdu hiba na e kondishon teribel aki?

"Mira, Señor ta hasi tera bashí, ta destruie, ta biré bok'abou, i ta plama su habitantenan... Tera lo ta kompletamente bashí i kompletamente di plunder, pasobra Señor a papia e palabra aki... Tera ta sker habri, tera ta spleit for di otro, tera ta sakudí masha duru mes. Tera ta zeilu manera un burache, i ta keda zoya manera chosa den bientu, pasobra su transgreshon ta pisá riba dje, i e lo kai pa no lanta nunca mas" (Isaias 24:1, 3, 19, 20).

"Hende lo dreña skonde den kueba di baranka den burakunan den tera, pa motibu di e teror di Señor i pa motibu di e splendor di Su mahestat, ora ku E lanta pa hasi tera tembla" (Isaias 2:19).

Na e benida di Hesus, tera lo wòrdu sakudi violentamente segun e ta bira diripiente riba su as. E profeta Amos ta bisa ku solo lo baha merdia (Amos 8:9,10). E movimentu diripiente di mundu lo kousa e temblor di mas violento ku mundu hamas a konose.

"I e tres spiritunan a reuni e reinan na un lugá ku na lenga hebreo yama Armagedon. I e di shete angel a basha su skalchi den atmosfera. E ora ei for di e tempel for di e trono, un stem duru a grita: 'A kaba!'. I welek tabata kòrta i bos tabata ronka i klap. Tabatin un temblor pisá, manera nunca tabatin for di dia ku tin hende riba mundu; asina teribel e temblor ei tabata" (Revelashon 16:16-18).

E bataya di Armagedon ta wòrdu tresé na un fin diripiente dor di e aparensia di Hesus i e temblor di mas grandi ku nunca a wòrdu sinti. E temblor aki ta move serunan i islanan for di nan lugá, i ta basha tur stat abou. "I tur isla a hui bai, i e serunan no a wòrdu haña mas" (Revelashon 16:20).

Na 1908, Italia a wòrdu sakudi pa un temblor ku a mata 75.000 hende den 10-sekònde. Na aña 1923 Hapon a wòrdu sakudi pa dos (2) minüt i 250.000 hende a muri. Kon e dia teribel ei lo ta ora ku Dios lanta "pa sakudi e tera teri-belmente?" Esnan matá riba tera e dia ei lo ta for di esun punta di mundu pa e otro.

E MALBADONAN DESTRUI

5. Kon esnan malbado bibando den tempu di Hesus Su segundo benida lo sinti enkuanto nan oro i nan plata?

"Hende lo dreña den kuebanan den baranka i den burakunan den tera, pa motibu di e splendor di Su mahestat, ora ku e lanta pa hasi tera tembla. Den e dia ei hende lo tira nan ídolonan di plata i nan ídolonan di oro ku nan a traha pa nan adorá, pa mòl i raton di anochi" (Isaias 2:19,20).

Awendia mayoria ta hendenan ku ta muchu okupá ku trabou, negoshi of kehasernan di bida, pa tuma tempu pa Dios, pa estudio di Beibel, of pa orashon. Den e dia ei, ora ku hende realisa ku nan a permiti ganamentu di plaka gaña i stroba nan for di bida eterno, nan lo tira nan oro i platanan pa djaka i ratonnan dianochi. Pero, lo ta muchu lat! Nan a warda muchu largu pa prepará pa Hesus Su benida.

Awendia, hende hoben i bieu tin pensamentu solamente pa fiesta, bailamentu, i entretenimentu pa

loko. Pero, ora Hesus bini, tur lo ke kambia diripiente. Hende lo hisa kara wak ariba, i pa nan teror, realisa ku e fin di mundu a yega i ku nan no ta kla.

"E ora ei e señal di e Yu di Hende lo parese na shelu, i e ora ei tur e tribunan di riba tera lo lamentá, i nan lo mira e Yu di Hende ta bin riba e nubianan di shelu ku poder i gran gloria. I E lo manda Su angelnan ku un zonido duru di tròmpèt i nan lo reuní Su eliginan for di e kuater bientunan, for di esun ekstremo di shelu te na e otro" (Mateo 24:30,31). Oh, ki importante e ta pa kada hende prepará pa e dia ei AWOR!!! Resa pa bo mayornan, rumannan, pa otro famia i konosirnan, pa nan tambe por prepará prome ku ta muchu lat, pa semper.

6. Kiko lo sosode e dia temeroso ei ku esnan malbado, ku no a hasi kaso di e spiertamentunan?

"I e shelu a hala sera manera un ròl ora ku e wòrdu lora; i tur seru i isla a wòrdu kitá for di nan lugá. I e reinan di tera di tera i e hòmbeman grandi i e komandantenan i e rikunan i e poderosonan i tur esklabu i hòmber liber a bai skonde den e kuebanan i meimei di e barankanan di e serunan; i nan a bisa e serunan i e barankanan: 'Kai riba nos i skonde nos pa e presensia di Esun ku ta sinta riba trono, i e furia di e Lamchi; pasobra e dia grandi di nan furia a yega, i ken lo por keda para?' (Revelashon 6:14-17).

"I e ora ei e malbado ei lo wòrdu manifestá, kende Señor lo destruí ku e rosea di Su boka i kaba kuné ke resplendor di Su benida"(2 Tesalonisensenan 2:8).

Segun esnan malbado mira Hesus bini riba e nubianan di shelu, i nan grita pa e barankanan i serunan kai riba nan, e tera lo sakudi violentamente bou di nan pia. Nada ta solido mas. Nada ta sigur. Tur kos ta konfushon i teror. Hende lo ta yená ku sustu. Anto, segun Hesus ta aserkando tera, Su gloria ta destruí tur esnan malbado ku ta bibu ainda. Ta solamente esnan hustu por soporta e gloria ei, i nan por mir'E solamente pa medio di e forsa selestial, ku Hesus ta duna nan. Tur esnan malbado ta kai abou muri na e aparensia glorioso di Hesus.

REUNION DI E HUSTUNAN

7. Ki evento maravioso Pablo ta konekta ku e fin di mundu i e segundo benida di Hesus?

"Pasobra Señor mes lo baha for di shelu ku un gritu, ku bos di arkangel i ku tròmpèt di Dios; i e mortonan den Kristo lo lanta promé. E ora ei nos ku ta na bida, i ku a keda, lo wòrdu tuma den e nubianan huntu ku nan pa kontra ku Señor den laira, i asina nos lo ta semper ku Señor" (1 Tesalonisensenan 4:16,17). Dos evento grandi lo tuma luga: e mortonan hustu lo wòrdu lanta for di morto pa bida inmortal, i nan ta wòrdu hiba ariba den nubianan, huntu ku e hustunan bibu, pa

nan ta huntu ku Hesus, i subi bai shelu huntu kunE i Su angelnan.

Papiando di e prome resurekshon, ku ta esun di e hustunan, Revelashon 20:4 ta bisa: "... i nan a bolbe biba i a reina ku Kristu pa mil aña" .

Ku e hustunan ta bandoná e tera aki i ta bai ku Hesus, ta wòrdu aklara masha bon den e siguiente palabranan: "I ora Mi bai i prepará un luga pa boso, lo Mi bin atrobe i risibi boso serka MI, pa kaminda Ami ta, boso tambe por ta" (Juan 14:3).

Tur esnan malbado ta wòrdu mata pa e splendor di Hesus Su benida, pero tur esnan hustu, inkluyendo esnan morto ku a resusita i esnan ku ta na bida ainda ora Hesus bini, lo wòrdu hiba shelu pa reina kunE pa mil (1000) a`na.

E MILENIO

8. Kiko e hustunan lo hasi den shelu?

"O boso no sa ku ta e santunan lo huzga mundu?..."

Boso no sa ku nos lo huzga angelnan?

(1 Korintionan 6:2, 3)

Durante e mil añanan den shelu, esnan hustu lo por mira den e bukinan di informe i mira pakiko diferente hende no tabata salbá. Hopi hende, ku nan a pensa tabata masha bon hende, lo falta e dia ei. Un persona por tabata tene na un pika sekretu; podise un otro tabata pensa ku e no tin mester di sigui tur e Dies Mandamentunan.

Den e dianan ei e kaso di tur esnan perdí , i tambe e registro di e angelnan ku a kai, lo keda habrí pa esnan salbá investigá; i tur hende lo ta kapas pa mira, ku Dios tabata hustu den Su husgamentu.

9. Na unda Satanas ta durante e mil

añanan? Satanas i su angelnan ta mará riba e tera aki den su kondishon di abismo, desolá pa mil añanan. Pa mas o menos seis mil (6.000) aña, Satanas a gaña e hendenan di e mundu aki. Durante e milenio lo no tin ningun hende mas pa tenta òf pa gaña, pasobra tur e hustunan a wòrdu hiba shelu, i tur e hendenan malbado ta morto.

Pa mil aña Satanas ta fòrsá pa pensa riba e resultado-nan di su rebelion teribel kontra Dios. Rondoná pa e suidatnan grandi, tur na ruina, i desiertonan desolá, i kadavernan innumerabel di tur esnan morto, lo e realisa e horror ku piká a trese riba mundu. Riba e dia ei Satanas lo pensa riba algun di boso, e lo pensa kon el a tenta boso, i kon de bes en kuando el a pone boso sinti, ku boso no por bandona algun kosnan pa Hesus-ku boso no por obedese Su man-damentunan, i awor boso ta destruí.

Anto Satanas lo rekorda riba otronan, kon Hesus

a yuda nan; kon nan a para firme pa e berdat, i kon nan a bai henter e kaminda i a bandona tur kos pa Señor. Pa motibu di nan entrega, nan ta na e momentu ei huntu ku Hesus den shelu, durante e mil añanan.

AMIGU, riba e dia ei lo bo ta agradesido ku bo a entrega tur kos pa Hesus!

10. Kiko ta pasa ku esnan malbado na final di e mil añanan?

"E restu di e mortonan no a bolbe biba te ora ku e mil añanan a keda i ora ku e mil añanan keda kumplí, Satanas lo wòrdu di lòs for di su prizòn, i lo sali pa gaña e nashonnan ku ta keda den e kuater skinanan di tera. Gòg i Magòg, pa reuni nan pa guera; nan kantidat ta manera e santu kantu di laman" (Revelashon 20:5, 7, 8)

Na final di e mil añanan, esnan malbado ta lanta den e segundo resurekshon teribel, e "resurekshon di kondena-shon", manera Hesus a yama esnan perdí den Juan 5:29. Un biaha mas mundu lo ta yen di hende; miles di esnan perdí di tur siglo lo ta na bida atrobe riba tera.

Satanas i su angelnan no ta so mas. Nan ta keda librá for di nan prisòn di isolashon i ta sali pa gaña e nashonnan i reuní nan pa bataya.

BAHAMENTU DI E STAT SANTU

11. Kiko lo wòrdu mirá, bahando for di shelu?

"I mi a mira e stat santu, Jerusalèm nobo, ta baha for di shelu, for di Dios, prepará manera un brùit dòrna pa su esposo" (Revelashon 21:2).

Paga tinu na unda Hesus Su pianan ta sosega, ora ku e Jerusalèm Nobo para abou riba etera aki.

I den e dia ei Su pianan lo para riba Seru di Oleifi, ku ta keda dilanti di Yerusalèm, parti pariba; i Seru di Oleifi lo spleit den dos for di pariba te pabou, kousando un vaye masha masha grandi, asina ku mitar di e seru lo move den direkshon nort i e otro mitar den direkshon sùit. Zakarias 14:4.

E Ultimo lugá riba tera aki, ku Hesus Su pianan a toka prome ku SU asenshon tabata top di e Seru di oleifi i esei ta e prome lugá, ku Su pianan lo toka atrobe, era ku e Yerusalem Nobo baha riba tera. Segun ku e stat santu ta baha for di shelu riba e tera aki, e ta wordu rondoná pa esnan malbado. Dor di su murayanan di kristal esnan pèrdi lo mira den e stat bunita, i un diluvio iresistibel di desesperashon lo bini riba nan, segun ku nan ku nan a p érdé shelu i bidá eterno pa semper.

O amigo, esei lo ta un ora spantoso! Den e Stat Santu lo tin mamanan; pafó lo tin algun tatanan, of paden lo tin tatanan, miéntras ku e mamanan lo ta pafó kontá den esnan perdi. Esnan pafó no tabatin tempo pa religion prome; pero kon nan lo gusta di tende nan esposa of esposo resa awor pero ta muchu Muchu lat! Nan a tarda muchu pa someté, i awor nan ta pèrdi eternamente.

PREGUNTANAN PA REPASO DI LES 19

1. Bo a siña bo Versikulo di Memoria? _____
2. E palabra "milenio" ta nifiká "mil Aña". E ta Berdat of Falsu? _____
3. Deskribiendo e tera komo un fuga seku i desolá, kaminda Satanas lo ta matá, Juan ta yam'é un _____ den Revelashon 20:3 (Par. 1).
4. Kuantu ser humano lo ta bibu durante e mil añanan? _____ (Par. 2).
5. Ken lo ta riba tera? _____ i su _____ (Par 9).
6. Na e benida di Hesus, esnan _____ lo ta destruí pa e splendor di Su gloria (Par. 6).
7. Ora Hesus bini, e mortonan hustu lo wòrdu lanta for di nan _____, i huntu ku e hustunan ku ta na bida, nan lo wòrdu hiba _____
8. Na fin di e milenio esnan _____ ta wòrdu lanta.
9. Juan a mira e Stat Santu, e _____, bahando riba e tera aki.
10. Satanas ta gaña esnan malbado, pa trata di kohe e Stat Santu, i nan ta kore bai atak'e, pero _____ ta baha for di shelu i _____ (Par. 12).
11. Anto Hesus lo kita tur marka i memoria di _____ for di nan mente, i lo E hasi tur kos _____ (Par. 13).

PREGUNTA DI KURASON:

Bo ta determiná pa sigui Hesus tur e kaminda, asina ku bo por ta kla pa e fin di mundu? _____

Lo bo traha i resa pa bo simanan tambe ta kla pa Hesus Su glorioso benida? _____

MI NOMBRE I DIREKSHON:

Nòmber: _____ Fam: _____

Kaya: _____ Number: _____ Stat: _____

Debolbé e papel aki pa korekshon na: BOS DI PROFESIA - P.O. BOX # 300 - Curacao N.A.